

Evangelisch Kirchgmeinde Bobbawailer
Schwäbischer Gottesdienscht am 2. Juni 2019
mit de neie Konfirmanda on de Achzger

Wochaschbruch: Onser Herr Jesus Christus secht: Wenn i wegzoga
werd von dera Welt, noo will i elle zu mir ziaga! Joh 12,32

Oofangsgruaß

I 440,1-4 Äll Morga isch ganz frisch on nei

Psalm 23 uff schwäbisch

Eigangsgebet on schdills Gebet

Schriftlesong: Jeremia 31,31-34 (*selber*)

Drehorgelschbiel (*fir dia 80er-Jubilar*)

Vorschdellong von de neie Konfirmanda

II 334,1-6 Danke

Bredicht

III 637,1-3 Ens Wasser fallt a Schdoi

IV 170,1-4 Komm, Herr, schdand ons bei

Oofangsgruaß

Griaß Gott, liabe Leit! I frei me ganz arg, dass ihr eich heit hertrauten – on mir wie eich selbr zuatrauat, dass mr au uff Schwäbisch an rechta Gottesdienscht mitanandr feira kennat!

Derf mr des ibrhaupt, uff Schwäbisch, also en dr Mundart, Gottesdienscht feira? I glaub scho! I woiß nemlich, dass au onser Herr Jesus en seira Mundart gschwätzt on bredicht hot – worom also sollat mir des net au kenna on derfa? Außerdem glaub i, dass onsr Herrgott alle Schbroocha vrschdoot, also au Schwäbisch, dr schenschde von alle Dialekt ...

On deshalb lad i Se heit herzlich drzua ei, so guat's gooht au uff Schwäbisch mitzomsenga on mitzombeta. On wenn's net gooht, noo lassat Se halt dia andere laut beta on senga on machat Se leis oddr enna dren – hälenga halt – mit!

I fir mein Deil vrsuach, so langsam wie meglich zom schwätza. On wenn Se gar nix me vrschdandat, no schdreggat se ruich – i vrsuach dann zom Ibrsetza!

'S erschd Liadle hoißt: Äll Morga isch ganz frisch on nei

Votum:

On so feirat mir den Gottesdienscht
en Gott's Nama, der onser Vadder isch,
em Droodenka an onsrn Herra Jesus Christus,
on vollr Hoffnung uff Gottes guata Geischt on sei Kraft en onserm
Leba.
Amen.

Psalm 23 uff schwäbisch em Wechsl

Dr Herrgott isch mei guater Hirt,
deshalb wird mir's an nix fehla.

Er weidat mi em saftiga Wiesagrund
on brengt mi emmr an a frisches Wässerle.

Er macht mei Seel frisch on frei.
Er fihrt mi uff dr richtiga Schdrooß,
uff sein guata Ruaf koo i mi vrlassa.

On au wenn's ammool durch an donkla Hohlweg gooht,
han i koi Angscht,

weil du emmr bei mr bisch,
dei Hirtaschtab isch mei ganzer Troscht.

Du decksch mr dr Disch,
on meine Feind miaßat mr beim Feschtesa zuagugga.

Du lesch Salbeel ibr meine Hoor laufa
on schenksch mei Glas emmr voll ei.

Mei ganz Leeba lang wirsch du guat on barmherzig zu mir sei,
on fir emmer on ewich werd i en deim Haus bleiba!

*Ehr sei em Vadder on seim Sooh on em heiliga Geischt.
So wia des scho emmr war, on au bleiba wird,
heit on bis en älle Ewigkeit. Amen, Amen.*

Eigangsgebet

Liabr Heiland!

Mir dankat dir fir den Dag heit, den du ons widdr schenksch.

Mir dankat dir fir dei Sonn on dein Rega heit on en dr letschda Woch.

Mir dankat dir fir dia neie Konfirmanda, dia geschdrn oogfanga hen on sich nochher zeigt.

Mir dankat dir fir dia Achzger, dia sich heit treffat on den Dag doo em Gottesdiensch mitanandr oofangat.

Mir dankat dir, dass du selbr mit ons feiersch on ons au vrschdoosch, wenn mr uff Schwäbisch sengat on betat.

Danke fir dia Schdond, dia mr jetzt zamma sen on wo du ganz nei zu ons kommsch! Amen.

Betat Se ruhig weitr enna dren – mitanandr on firanandr!

Schriftlesong: Jeremia 31,31-34

Guggat gnau noo on heerat, was onser Herrgott secht: 'S dauert nemme lang, bis i an neia Vrtrag mit meim Volk abschliaß.

Der isch net wia dr alt Vrtrag, den i mit ihre Vorfahra gschlossa han. Domols han i se an dr Hand gnomma on aus Egypta rausgholt. Abbr se hen da Vrtrag net ghalta, obwohl i doch ihr Herrgott gwä ben!

Deshalb heerat, was onser Herrgott secht: So soll dr neie Vrtrag aus-seha, den i mit ehne schliaßa will: I will mei Gsetz en ihr Herz neilega on en ihr Denka neischreiba. Noo sollat se ganz mei Volk sei on i will ganz ihr Herrgott sei.

On noo wird koiner meh dr Schualmoischdr schbiela ibr dia andere on ehne saga, wia se mi, ihrn Herrgott, erkenna sollat – se werdat nemlich älle merka, wia i zu ehne ben, dia Kloine gnauso wia dia Große. On i will ehne ällas Beese wegnemma, des se doa hen, on will nemme droodenka, was se falsch gmacht hen. Heeret, was onser Herrgott secht!

Bsonderer Gruaß an dia Achzger: Schee, dass r doo send!

Drehorgelschbiel (*fir dia 80er-Jubilar*): Großr Gott, mir lobat di!

Vorschdellong von de neie Konfirmanda, dia noo au ihr Bibl griagat

Liadle: Danke uff schwäbisch

Evangelisch Kirchgemeinde Bobbawweiler
Schwäbischer Gottesdienst am 2. Juni 2019
Bredicht zom Tegscht: Epheser 3,14-21 (Pfarrer Häcker)

Liabe neie Konfirmanda, liabe Leit!

Was bringts, ob mr glaubt oddr net? Hilfts meim Leba, wenn i bet on en dr Bibl les? Isch dr Konfis bloß a Chance, emma Joohr a guats Geld zom macha, oddr schdeggt doo no meh drhendr?

I glaub scho, dass des was bringt, dia Sach mit Gott on mit am Jesus. I wär joo gwieß net Pfarrer, wenn e's net selbr glauba dät! Abbr weil i droo glaub, dass 's außr am Geld on außr derra Welt no was anders gibt, des fir mi wichtig isch, will e des au weidsaga.

Des koo 'ne abbr bloß, weil 's andere Leit gää hot, dia mir weidrgsagt hen, was ehne wichtig war: mei Muadr schdoot doo drfir an erschr Schdell. Wia han i mi jedan Oobend beim ens-Bett-gea uff dia biblisch Gschicht gfreit! On äll Dag hot se mit ons Kendr betat. I woiß no gnau, wia des kloine Gebet ganga isch an dr Hausdier, wenn e en d' Schual ganga ben. I glaub, des war ganz arg wichtig fir mein oigana Glauba!

Nebr meinr Muadr hots no andere Leit geba, dia mr von Gott vrzehlt hen: d' Kenderkirch-Dande on d' Jungscharleiter, d' Relilehrere en dr Grundschual, dr Pfarrer en dr Kirch on schbädr d' Proffessor an dr Uni. Älle hen ihrn Doil drzua beitraha, dass i 's Glauba glernt han on 's Beta on 's Bibllesa. On dass i emmr meh vrschdanda han drvo – obwohl i gwieß no lang net ällas woiß on emmr no am Lerna ben!

On dann gibts doo no was, was i ganz arg wichtig fend: nemlich dass es Leit gibt, dia fir oin betat. Dia so an Gott glaubat, dass se ehm zuatruet, dass er helfa koo. On dass sich was vrendrt, wenn mr betat. Oinr von dene war dr Paulus, an ganz wichtigr Missionar am Oofang vom chrischdlicha Glauba. Von ehm gibts en dr Bibl ganz a Haufa Briaf, wo nr de Leit schreibt, wia des gwä isch mit am Jesus on was des fir's Leba bedeita koo. On weil d'Leit dia Briaf uffghoba on gsammlt hen, kennat au mir no dren lesa.

Aus oim von dene Briaf les i jetzt was vor – i han vrsuacht, des au uff Schwäbisch omzomschreibha. Also dr Paulus hot do gschrieba:

**I gang vor onserm Gott en d'Knia on bet zu ehm, onserm Vadder.
Er hot älle an Nama geba on lesst ällas leba.**

I bet zu ehm, dass er eich reich beschenkt on dass sei Geischt eich schdark macht.

I bet zu ehm, dass durch eiern Glauba dr Herr Jesus Christus en eich lebt on dass sei Liab eich trecht und fescht hält.

I bet zu ehm, dass ihr älle mitanandr begreifaf, wia reich Gott eich beschenkt.

Mitanandr sollat ihr merka, wia groß dia Liab isch, dia dr Herr Jesus Christus zu eich hot. Koi Mensch koo se begreifa.

So werdat ihr emmr meh neiwachsa en des volle Leba, des Gott eich schenkt.

Onser Herrgott koo nemlich viel meh doah, als mir ons zom beta truat oder ons denka kennat, on sei Kraft isch ibergrößer.

Deshalb sollat mir ehn en dr Gmeinde loba on ehra, durch sein Sooh Jesus Christus, heit on en älle Ewigkeit! Amen.

I seh doo an Moo emma Zemmr uff am Boda kniela, mit gfaldate Hend on gschlossane Auga. Nix soll ehn vom Beta ablenka oddr drausbrennga. Er denkt bloß an des, was r Gott saga will on sich von ehm wenscht. On doo isch ehm heit ois ganz wichtig: dia Leitla nemlich, dia no ganz am Oofang von ihm Glauba schdandat. Des sen Leit, dia bis vor kurzam no nia was von Jesus gheert ghet hen, erscht von ehm, am Paulus. On des, was se doo gheert hen, hot ehne so guat gfalla, dass se oogfanga hen, droo zom glauba. Z'erscht warats bloß a baar, noo sends emmr meh worda. A kloine Gmeinde isch entschdanda. Se hen mitanandr en de heilige Schriffta glesa, dia dr Paulus ehne mitbrocht hot. On se hen beschdimmt au mitgschriebe, was er gsagt hot, wo nr no doo gwä isch.

Abbr jetzt isch r nemme doo, weil er wo andrs de Leit von Jesus erzähla will. Jetzt miaßat se selbr gugga, dass ihr Glauba net vrlora goht on se emmr meh drvo vrschdandat. Doo hilft ehne so an Briaf vom Paulus ganz arg. Se merkat, dass r se net vrgessa hot on an se denkt. On se merkat au, dass r fir se betat.

Aus meim eigana Leba woiß i: Des duat richtich guat, wenn doo jemand isch, der fir mi betat! Der droo glaubt, dass Gott mir helfa koo on emmr bei mr isch. Bis heit denk i, wia oglaublich wichtig des war, dass mei Muadr fir mi betat hot! Des woiß i nemlich, se hot mr's els gsagt. Vor ällam dann, wenn se Angscht ghet hot, dass mir andere Sacha wichtigr werda kenndat als dr Glauba ...

I gang vor onserm Gott en d'Knia on bet zu ehm, onserm Vadder – i ben mr sicher, dass solche Leit au heit ondr ons sen, dia fir andere betat: Miadra on Väddr, Großeltern on Freind. Eich alle will i Muat macha: Herat doo drmit nia uff! Vrtrauat au weidr druff, dass 's Beta hilft on dass onser Herrgott hert, was mr ehm sagat!

Ois no: Dreimool secht dr Paulus, fir was gnau er betat:

I bet zu ehm, dass er eich reich beschenkt on dass sei Geischt eich schdark macht.

I bet zu ehm, dass durch eiern Glauba dr Herr Jesus Christus en eich lebt on dass sei Liab eich trecht und fescht hält.

I bet zu ehm, dass ihr alle mitanandr begreifaf, wia groß dia Liab isch, dia dr Herr Jesus Christus zu eich hot. Koi Mensch koo se begreifaf.

Dr Paulus isch sich ganz sicher: des brengts echt, dia Sach mit Gott on mit am Jesus! Des isch net bloß fir kloine Kendr on alte Leit, sondern fir alle – bsonders fir dia em beschta Alter! 'S moint zwar jedr, dass r ganz guat durchs Leba kommt on ällas selbr noogriagt. On solang 's oim guat goot on ällas lauft wia gschmiert, koo des scho so sei. Abbr wehe, wenn amool was schiaf gooht! Wenn 's Leba anders lauft wia denkt on plant! Noo braucht mr äls ebbr, wo oim hilft, oin an dr Hand nemmt on au zu oim schdoot, wenn alle andere schon weit weg sen on mr bloß no ihr henders Gsicht sieht!

On grad noo – so denkt on secht dr Paulus – grad noo koo dr Glauba an Gott on an dr Jesus oheimlich helfa! Weil r oin nemlich mit Leit zamma bringt, dia au glaubat. Dia so lebat, wia se's glaubat. Dia wisat, wia Gott se moog, on deshalb ihre Mitmenscha grad so meegat.

Weil des isch so zemlich 's Wichtigschte, was dr chrischtliche Glauba secht: dass mr *begreifaf, wia groß dia Liab isch, die dr Herr Jesus Christus zu ons hot*. En dera Liab wird 's Leba oheimlich reich on wertvoll. I woiß nix anders, des grad so viel wert wär!

Deshalb, liabe neie Konfirmanda, liabe Leit, feirat mir au emmr widdr Gottesdienscht! Weil mr doo feirat, wia onser Gott ons moog – on dann au onser Mitmenscha meega kennat.

I hoff, dass ihr Jonge des en de negschte Monat, wo nr en dr Konfis gangat, fir eich entdeckat! Dass eich dr Glauba an Gott on an dr Jesus wichtig wird. Dass r *emmr meh neiwachsaf en des volle Leba, des Gott eich schenkt*, wia 's dr Paulus schreibt. Wenn des was wird – noo wird net bloß d' Konfiszeit guat, sondern 's ganze Leba! Amen.

Gebet fir andere

Liabr Heiland!

Mir dankat dir fir den scheena Dag heit, de du ons schenksch – on wissat doch ganz genau, dass 's net alle Leit heit so schee hen.

Deswäga wellat mr au an dia denka, die dei Hilf brauchat oder braucha kennat, on betet fir se:

Mir betat zu dir fir alle, dia heit koi Freid hen, weil se alloi sen on koinr nach ehne guggt. Schenk ehne grad heit an guata Bsuach oddr Ooruaf, der ehne guat duat!

Mir betet zu dir fir alle, dia Angscht hen – om sich selber on ihr Xondheit, om ihre Kendr oder Eltern, om ihr Gschäfft on weggam Geld. Schenk ehne a Hilf, dia ehne d'Angscht nemma koo!

Mir betet zu dir fir alle, dia net wissat, was se no glauba kennat. Dia koin Halt hen en ihtm Leba on koin rechta Gedanka, wia's weidr ganga soll. Schenk ehne ebb, der ehne dr Weg zeigt – grad au dr Weg zu dir!

Mir betat zu dir fir alle, dia mit deinr Kirch ozfrieda sen, dia austrettat oddr komische Heilige uff dr Leim gangat. Schenk ehne Menscha, dia ehne dei Liab on dei Doosei widdr nei schenka kennat!

Mir betat zu dir fir dei Kirch, doo bei ons on om ons rom on iberall, wo's no Leit gibt, dia zu deira Kirch gheerat. Schenk, dass net bloß d' Glocka zom heera sen, sondern dei guats Wort mendeschtens grad so laut!

Mir betat zu dir fir ons, liaber Heiland, weil mir di äll Dag nei brauchat on doch so oft koine Gedanka fir di ibrig hen. Schenk ons emmr widdr kloine Pausa am Dag, wo mr an di denkat on ons uff dein Weg eilassat.

Danke, dass du emmr an ons denksch on bei ons bisch!
Danke, dass du ons oendlich moogsch!

Amen.

On mitanander betat mr, wia's dr Heiland ons vorbetat hot:

Onser Vadder uff Schwäbisch

Onser Vadder em Hemml,
dei Nama soll ons heilig sei.
Dei Reich soll komma.
Dei Wille soll gscheha,
bei dir em Hemml on bei ons en dr Welt.
Gib ons äll Dag, was mr brauchat.
On vrgib ons, wenn mr schuldig worda sen,
so wia au mir dene vrgebat, dia an ons schuldig worda sen.
Brenng ons net en ebbas nei,
mach ons abbr vom Beesa frei.
Dir alloi gheert 's Reich on d Kraft on d Herrlichkeit
en älle Ewigkeit.
Amen.

Sega uff Schwäbisch

- vom Manfred Mergel –

Dr Herr, dei Gott,
soll om de sei,
soll de leita on begleita
em Leid on en dr Freid –
jetzt on heit on älle Zeit.
Amen.